



IC-ШАРА

ЕСКЕРТКІШ-ТАҚТА ОРНАТЫЛДЫ

Алматыда мемлекет және қоғам қайраткері, ел тәуелсіздігіне елеулі еңбек сіңірген азамат Сергей Терещенконың рухына тағзым етіліп, оның құрметіне өзі тұрған үйге ескерткіш-тақта орнатылды.

Айнабай
МӘДИ

Салтанатты іс-шараға қатысқан мемлекеттік қызметкерлер, саясаткердің жақын-жуықтары, қала тұрғындарының арасынан сөз алғандар Сергей Александрович жөнінде жылы лебіз, естелігімен бөлісті. Ол еңбек-қорлығымен, қиындыққа төтеп бере білетін қасиетімен дараланды. Оның өте білімді, түрлі тақырыпта әңгіме жүргізе алатын, адаммен әркез ортақ тіл табысуды білетін абзал азамат екені айтылды. Ресейдің Примор өлкесінде дүниеге келіп, колхоз инженерінен ел үкіметінің басшысына дейінгі өмірлік әрі кәсіби тұрғыдағы ұзақ жолдан өткен С.Терещенконың басшылығымен тәуелсіздіктің алғашқы жылдары талай ауқымды әлеуметтік-экономикалық реформалар әзірленіп, жүзеге асты. Қазақстан халқы Ассамблеясын, еліміздің сақтандыру нарығына қатысушылар қауымдастығын басқарды, омарташылардың ұлттық одағын құрды. Ол Forbes мәліметінше, еліміздегі ең ықпалды 50 бизнесменнің тізіміне енген.

«Еліміздің мемлекеттік институтының қалыптасуына зор үлес қосқан көрнекті мемлекет және қоғам қайраткері Сергей Терещенко тұрған үйге ескерткіш-тақта орнатылды. Азаматтың рухына тағзым етеміз. Салтанатты іс-шараға жиналған барша қауымды, Сергей Александровичтің жұбайы мен қыздарын, тума-туыстарын осы айтулы оқиғамен шын жүректен құттықтаймын», – деп тілегін білдірді Алматы қаласы әкімінің орынбасары Арман Қырықбаев.

С.Терещенко ел экономикасына ерен еңбек сіңірді, ауыл шаруашылығын көтерді. Бір саяси жүйеден екіншісіне көшкен бетбұрыс кезеңде, Тәуелсіздіктің алғашқы жылдары үкімет басшысы болған Сергей Александрович шын мәніндегі Еңбек Ері еді. Қазақстанның еңбек сіңірген дәрігері Ахат Мүліков Сергей Александровичтің Дүниежүзілік омарташылар конгресін ұйымдастыруға көмектескені жайлы былай деді: «Біз науқастарды емдеуге бал арасы өнімдерін пайдаландық. Ол біздің ауруханада «Қазақстан мен Еуразияда сырқаттарды бал арасы өнімдерімен емдеу» атты ғылыми-практикалық конференция ұйымдастырды. Мамандар Еуропа елдерінен, Украинадан, Беларусьтан, Ресей мен Қырғызстаннан келді».

Сергей Александровичтің қызы Нина Сергеевна салтанатты ашылу рәсіміне қатысқандардың барлығына алғысын білдірді.

«Әкем бізді, балаларын өзгеге мейірімді болуға үйретті. Ел үшін көп еңбек сіңірген әкеміздің естелігін сақтағымыз келеді. Серуендеу кезінде Алматы тұрғындары мен қонақтары ескерткіш-тақтаға назар аударатыны анық. Сөйтіп, біз өзі 30 жыл тұрған үйге мемориалдық тақта ілдік. Әкем омартамен айналысып, бал жинауды армандайтын. Әкешім елін сүйді, бау-бақша баптауды жақсы көретін. Алматыны жанындай жақсы көрді. Қалада көбірек алма бағы болғанын қалады», – деді Нина Терещенко.



БРИФИНГ

ТҰТЫНУШЫЛАР ҚҰҚЫҒЫ ҚОРҒАЛАДЫ

Құралай
ИМАНБЕКҚЫЗЫ

Алматы қаласының Сауда және тұтынушылардың құқығын қорғау департаменті быттыр тұрғындардан келіп түскен 8 мыңға жуық өтінішті қарады. Жоспардан тыс тексерулер мен заңгерлік кеңес беру нәтижелері бойынша тұтынушыларға 223 929 миллион теңге қайтарылды. Бұл деректермен Өңірлік коммуникациялар қызметі алаңында өткен брифингте департамент басшысының орынбасары Нұрлан Әбдиев бөлісті.

Өтініштерді қарау қорытындысы бойынша департамент жоспардан тыс 100 тексеру жүргізіп, 314 әкімшілік жаза қолданылған. Ең көп өтініштер бөлшек сауда бойынша келіп түсті.

Ішкі нарықта отандық өндірушіні қорғауды қамтамасыз ету және тұтынушылардың құқығын қорғау мақсатында «Сапалы өнім» әлеуметтік жобасы шеңберінде жұмыстар жүргізілуде.

«Сапасыз азық-түлік тауарларын анықтау және оларды өткізудің жолын кесу мақсатында Алматы қаласы бойынша Техникалық реттеу және метрология, санитарлық-эпидемиологиялық бақылау, Сауда және тұтынушылардың құқығын қорғау департаменттері импорттық азық-түлік өнімдерінің тәртібін, тамақ өнімдерінің қауіпсіздігі нормалары мен техникалық регламенттердің талаптарына сәйкестігін зерттеу мақсатында мониторинг жүргізуде», – деп атап өтті спикер.

Сондай-ақ, департамент қызметіндегі басым бағыт тұрақты негізде жүргізілетін және оның шеңберінде әлеуметтік маңызы бар азық-түлік тауарларына баға белгілеудің барлық тізбектері бойынша делдалдық схемаларды тергеп-тексеру жөніндегі комиссияның отырыстарын үйлестіру және өткізу болып табылады. Быттыр тиімсіз делдалдар түріндегі бұзушылықтардың, сондай-ақ сауда саласындағы заңнаманы бұзудың 175 фактісі анықталды және жойылды. Жосықсыз кәсіпкерлерге қатысты 163 әкімшілік хаттама жасалды.

ВАЛЮТА
БАҒАМДАРЫ

EUR/KZT 491,36 теңге



USD/KZT 451,24 теңге



RUB/KZT 4,98 теңге



CNY/KZT 62,87 теңге

ӨНЕР

Суретті түсірген Самат ҚҰСАЙЫНОВ.



Сүйікті қаламызға халықаралық цирк келді

Алматыға Юрий Никулин атындағы Мәскеу циркі келді. Өнер иелері «Судағы цирк» шоуының «Aquamagine» атты жаңа бағдарламамен өнер көрсетеді. Гастрольдік сапар 3 ақпаннан 24 наурызға дейін өтеді. Халықаралық өнерпаздар Алматы циркінде өнер көрсетеді.

Пердехан
ШӘМШИЕВ

Гастрольдік сапардың шымылдығы 3 ақпанда ашылды. Цирктің табылдығын аттай салысымен құжынаған адамды көресің. Киім ілетін жерде адам толы. Бәрі де халықаралық цирктің өнерпаздарын көруге асығуда. Балалар мен ересектердің санында шек жоқ. Алғашқы күннің өзінде Алматы циркінде ине шаншар жер болмады. Кешігіп келгендер де болды. Алтығып келіп орындарын тауып жатыр жұрт. Оларға қолұшын беруге циркіміздің қызметшілері әрқашан дайын.

Бағдарлама әдемі биен басталды. Соңы әртістердің акробатикалық шоуымен жалғасты. Әуеде қалықтаған әртістердің әрекеттерін көріп таңқаласың, әрі уайымдап отырасың. Құлап кетпей ме екен дейсін. Бірақ әртістер спортшылар секілді өз бабында. Одан соң көрермендерді жануарлармен болған шоу таңқалдырды. Әйгілі сайқымазақ Дмитрий Шиндров балалар мен ересектерге керемет көңіл күй сыйлады. Бағдарлама соңында көрермендер әртістердің өнеріне тәнді болып, жылы лебіздерін білдірді.

Юрий Никулин атындағы Мәскеу циркі ең ескі цирктердің бірі. Сонау 1880 жылы ғимараты салынған. Сол жылы 20 қазанда алғаш рет көрермендерге өнер көрсетті. Юрий Владимирович Никулиннің басшылығымен цирк қайта түледі. КСРО Халық әртісі Ю.Никулин циркте 1982–1997 жылдары бас директор және шығармашылық басшы лауазымын атқарған.

Құрметті алматылықтар! Шынайы өнерді, балаларыңыздың қуанышын және жүздерінен күлкі мен таңқалуды көргілеріңіз келсе, Алматы циркіне асығыңыздар. Билет бағалары 2000 теңгеден басталады. Балаларыңыздың қуанышы үшін инвестиция салыңыздар!